



L'Escòla Occitana d'Estiu vos desira un bona novèla annada!

E en 2024 ?

Lo nòstre primier rendetz-vos es en fevrier per la **dimenjada daus amics de l'EOE**. Apres Tolosa, Montpelhièr e Girona, avem previst de nos retrobar a Pau, dau 9 au 11 de fevrier, per lo Carnaval Bearnés.

Avetz normalament ja recebut las informacions.

Rampelada : per quela dimenjada, cadun es responsable de se trapar un endrech per dormir.

Ligam : <https://mensuel.framapad.org/p/eoe-a493?lang=fr>

Mas sustot nos preparam per l'EOE venenta : se debanarà dau 11 au 17 d'aost 2024. E quò serà la 50ena Escòla Occitana d'Estiu. De segur, quò se festeja!

Notatz las datas, **e se nos voletz ajudar**, seguisssetz aqueu ligam :

<https://www.helloasso.com/associations/escola-occitana-d-estiu/collectes/50-ans-d-eoe-aquo-se-festa>

Escambis Occitans de la Davalada 2023, enquèra 3 jorns d'escambis riches a Colonha, Gèrs

Per la tresena annada, nos sèm retrobats a Colonha, Gèrs, per los Escambis Occitans de la Davalada (EOD) 2023, organizats per l'associacion EOE (Escòla Occitana d'Estiu), amb coma partenaris Ràdio País, los Talhièrs de l'Energia e del Temps, l'Ostau Comengés, l'illustradora Juliette Armagnac, lo CREO Tolosa, Ox'ivent, lo Cirdòc, l'Oplo. Après d'escambis sus la visibilitat de l'occitan (en 2022), sus l'aprendissatge per lo juec, los projèctes, e lo plurilingüisme (2021), avem chausit questa annada coma tematica : "Coma facilitar l'encontre e lo partiment tant de la lenga coma de la cultura occitanas?"

Coma per las doas prumieras edicions daus EOD, los tres jorns èran en autogestion e participatius. Quò vòl dire que tot lo monde participan a tot : cosina (se sovendrem tots dau pastisson au chocolat preparat per los dròlles), recapte, lavar la vaissèla, etc, de segur en fonccion daus besonhs. Los tres jorns de temps, doas exposicions eran presentadas : una sus « era hèsta dera Sant Joan » portada per Eth Ostau Comengés e una dau Cirdoc "País de cultura" sus la diversitat de la cultura occitana.

Enquèra un còp, fugueren tres jorns d'escambis riches, alternant discutidas e creacions collectivas intergeneracionals, amb de moments en grop per daissar a tot lo monde la possibilitat de s'exprimir.

Dins los moments de discutidas, nos sem interessats mai particularament a la nòstra coneissença de la cultura occitana, e a la percepcion -per nosautres e per los autres- de la lenga e de la cultura (totas las formas de cultura : tradicionala, de uei, folclorica, etc) occitanas. Tot quò via d'animacions / juecs adaptats a quela reflexion.

Puei per la partida creacion daus escambis, l'idea era de donar e de se donar de desfís a l'entorn de la cultura occitana, e de sa transmission. **Avem creat amassa un desfís per chada setmana de l'an que ven** : imaginar de desfís divers, lor redaccion/relectura, ilustracion, enregistrament de lor presentacion, qué travalh! Avem capitat d'aver 52 desfís diferents : n'i a per tot lo monde, de desfís per far descubrir aus autres, de desfís a se donar, dins la coneissença de la lenga, de la musica, de la literatura e enquèra mai. Los escambiaires son tots tornats amb un desfís de realizar en 2024. Qui vòu participar?

Per la descobèrta daus desfís seguissetz lo ligam :
<https://www.instagram.com/octotespossible>

La Quinzena Occitana 2023 : omenatge a las femnas d'Òc

Cada annada, pendent doas setmanas en octobre, se debana la Quinzena Occitana en Òut e Garona.

Lo collectiu d'associacions, « Quinzena Occitana », amb lo partenariat del Conselh departamental, lo sostien de la Region Novèla Aquitània, e en 2023 la municipalitat d'Agen, espandisson la cultura occitana sul territòri del 47 amb un programa cultural occitan d'una diversitat bèla e per totes los publics.

Ongan, la tematica èra centrada sus las femnas del territòri occitan, las « Femnas d'òc ».

Las escòlas bilingüas e la Calandreta Jansemineta d'Agen dubriguèron la Quinzena tre la matinada del 5 d'octobre, sus la plaça Jansemin de la comuna d'Agen amb un travalh dels bèlels : una mòstra de retraches d'escolans bilingües, revelant lor mot occitan plan causit jos lor cara luminosa, a costat d'òbras qu'avián pintadas sus de teissuts blancs, e que representavan de femnas que portèron o pòrtan las nòstras lenga e cultura : d'Alienor d'Aquitània a Teresa Duverger e Martina Ralu. Un travalh pedagogic dels bèlels, plan ric, e de mai pertocant per son costat intergeneracional.

L'inauguracion de l'eveniment se poguèt perseguir dins aquel encastre amb de cants e un balèti al mièg de la plaça, al pè de l'estatua de Jansemin, dins un ambient festiu e de partiment.

Lo programa que seguiguèt duscas al 22 d'octobre dins las vilas e vilatges del departament permetèt a un public divèrs de dançar sus de musicas de grops occitans variats, de participar a de conferéncias, de projeccions de filmes, mòstras, balètis, concèrts, lecturas musicalas, estagis de danças e de cants, espectacles pels dròlles dins mantuns luòcs culturals.

Una capitada per aquela Quinzena Occitana 2023.

L'avètz mancada ?

Ges de pensament, vos donam rendètz-vos per la seguenta, debuta d'octobre de 2024 ! Nautres i serem !

Exposicion a la Topina.

Pendent los EOD 2022, aviam fach de la calligrafia de tèxtes en occitan, qu'aviam aprèp serigrafiats sus de cartetas. Dempuèi la debuta de decembre, una mòstra a La Topina, lo restaurant-estanquet de Tolosa, qu'èra partenari dels EOD, n'en presenta una seleccion. I seràn fins au 10 de febrièr.



Call to action

Escola Occitana d'Estiu

16 rue de Pujols, 47300, villeneuve

This email was sent to {{contact.EMAIL}}

You've received this email because you've subscribed to our newsletter.

[Se désinscrire](#)

Envoyé avec
Brevo